



Han fatg ina bilantscha positiva dals dis da Nadal fin Bumaun: Marcel Friberg (dretg), il president da Grischun Vacanzas e Gaudenz Thoma, il directur da quella organisaziun.

FOTOS G. N. STGIER

«Avair quità da noss giasts svizzers»

Grischun Vacanzas: Apéro da Bumaun

DA GION NUTEGN STGIER / ANR

■ Plain optimissem per l'avegnir en ils lieus da turissem da noss chantun, dentant era Marcel Friberg, il president da Grischun Vacanzas. Da preschent essan nus sin buna via cun annunziar las regiuns turisticas bieras reservaziuns, ha ditg il Sursilvan a chaschun da l'apéro da Bumaun. Betg sco ils ultims onns sin il tetg dal bajetg da Grischun Vacanzas, mabain en il curtin da l'hotel Marsöl, ha gi lieu l'apéro da Bumaun 2014, da l'organisaziun tetgala dal turissem grischun. En noss chantun datti strusch ina occurrenza ch'attira uschè biera prominenzia en in culp sco quella dad ier en la chapitala grischuna. Era quest onn è danovamain stà il motto: vesair ed esser vesì. Vegnì è dentant betg mo fatg viva sin l'onn nov, mabain han cunzunt ils represchentants dal turissem era gist fatg ina bilantscha dals ultims diesch dis. «La naiv è bain vegnida in'emna memia tard, ma ella è vegnida», ha ditg Marcel Friberg, il president da Grischun Vacanzas. Ils lieus turistics han fatg il meglier or da quella situaziun, tuts exponentes dal turissem èn s'engaschads fitg e luvrà cun plaschair era grazia als blers giasts. «Nus

dastgain propi far ina bilantscha positiva ed esser cuntents cun l'entschatta da la stagiun», s'exprima Marcel Friberg. Era Gaudenz Thoma, il CEO da l'organisaziun tetgala da turissem e marketing dal Grischun, ha ditg ch'el haja retschet da tuttas regiuns turisticas da noss chantun be reacziuns positivs dals dis da Nadal fin Bumaun.

«Da preschent va tut en ina buna direcziun»

Marcel Friberg è dentant persvadì ch'ìls lieus da turissem da noss chantun vegnan ad avair ina buna stagiun d'enviern. Las premissas sajan fitg bunas era grazia a las reservaziuns numerusas e da preschent giaia tut en ina buna direcziun. «Sa chapescha che er nus essan fitg dependents da l'aura, ma sche quella constat lura pudain nus esser plain optimissem da far ina buna stagiun», ha ditg l'impressari da Breil. Nus avain blers buns exempels per vurdar positiv en il futur ed in da quels è per exempel l'avertura dal resort e hotel Privà Lodge a Lai e lura la colliaziun dals territoris da skis da Lai e dad Arosa, manegia Marcel Friberg. Primavera vegnà cumenzà cun la construcziun dal resort da vacanzas cun 500 letgs a Breil ed era

quai saja in fatg plaschaivel, di il Sursilvan. Ina occurrenza fenomenala cun ina buna reclama saja per exempel er stà il Tour de Ski a Lai, ha ditg il president da Grischun Vacanzas.

150 onns sport d'enviern

«Optimists dastgain nus dentant er esser cun avair quest onn numerus giubileums ch'attiran segir era blers giasts en noss chantun», manegia Marcel Friberg. Quai saja ina giada il giubileum da 125 onns Viafier retica, lura il giubileum da 100 onns Parc Naziunal e betg il davos lura il giubileum da 150 onns sport d'enviern. Dal reminent saja la tgina da quel en noss chantun, accentuescha Marcel Friberg. Quellas occurrenzas conferman ch'i vegnia fatg fitg bier per carmalar daplis giasts en noss lieus turistics e che l'optimissem saja avant maun, è Marcel Friberg persvadì. Cuntent è el dentant er che blers giasts svizzers fan lur vacanzas en il Grischun e che quels han tegnì las cifras da pernottaziuns ils davos onns cun esser fitg fidaivels. Marcel Friberg manegia: «Avair quità da noss giasts svizzers, quai è in pensum per tuts.» Tiers lur fidaivladad saja dentant er da gudagnar la bainvulentscha dals giasts da l'exteriur.



Da la partida a l'apéro da Bumaun èn er stads cusseglier guvernativ Mario Cavigelli (san.) e deputà Gian Michael.



Era vesì han ins Giovanni Netzer, l'intendant da l'Origen Festival Cultural e Doris Hidber Caviezel, cussegliera da citad da Cuira.



Omadus han fatg part da la regenza grischuna: Reto Mengiardi e Claudio Lardi (da san.).



Las pendicularas èn era dependentas da la politica: Martin Candinas, cusseglier nazional, Marcus Gschwend, mainagestiun Grischun Pendicularas e Silvio Schmid, president Grischun Pendicularas (da san.).



Politica e baselgia unida tar l'occurrenza dad ier a Cuira: Alois Maissen, l'anteriur cusseglier guvernativ, Martin Grichting, il vicari general e Luregn Mathias Cavelti, l'anteriur cusseglier dals chantuns (da san.).



Tranter ils giasts da l'apéro era Vera Stiffler, deputada e Barla Cahannes, l'anteriura deputada.